



MOCIÓN SOBRE A INMEDIATA LICITACIÓN E EXECUCIÓN DAS OBRAS NO ROMAÑO E GUADALUPE-VITE QUE FORON OBXECTO DE DESESTIMENTO

O **Grupo Municipal do Partido Popular**, ao abeiro do Regulamento Orgánico Municipal, presenta, para a súa inclusión no Pleno, a seguinte **MOCIÓN**

EXPOSICIÓN DE MOTIVOS

Hai máis de ano e medio, na sesión plenaria do mes de xaneiro de 2016, adoptábase por unanimidade dos grupos municipais o acordo de que “previa a modificación que se considere necesaria dos proxectos, se proceda a licitar novamente á maior brevidade posible a contratación das obras de actuacións viarias no sector 21-O Romaño e en Guadalupe-Vite Sector 40”.

Transcorrido un tempo máis que prudencial para cumprir co acordado, o Grupo Popular volve a reiterar esta cuestión para darlle solución ás demandas e expectativas da veciñanza da zona afectada desde hai varios anos.

Como se puxo de relevo na sesión plenaria de xaneiro de 2016, durante o anterior mandato, no transcurso da Xunta de Goberno Local do 22 de maio de 2015, acordouse a apertura do procedemento de licitación de dous proxectos para acometer distintas actuacións de gran transcendencia para a calidade de vida dos barrios do Romaño e de Guadalupe-Vite. Unhas melloras que viñan a resolver importantes carencias desas zonas en materia de accesibilidade, de saneamento, de urbanización e de seguridade viaria.

O proxecto de actuacións no sector 21- O Romaño, que contaba cun orzamento de 105.200 euros (IVE incluído) e un prazo de execución de dous meses, ía dirixido a afrontar seis obras: o saneamento da Ponte Romaño para conectar coa rede xeral de sumidoiros as vivendas que non teñen ese servizo; o asfaltado da pista ao muíño Catalina; o asfaltado dun tramo intermedio que carece del na unión da pista do Ameneiral coa travesía de Lermo; o asfaltado e acondicionamento das rúas Fonte de Lermo e Travesa de Lermo; e a canalización de augas e limpeza da pista de Casal da Horta desde Vista Alegre.

O outro proxecto de actuacións en Guadalupe-Vite sector 40, cun orzamento de 207.275 euros (IVE incluído) e un prazo de execución de dous meses e medio, tiña por finalidade a realización de obras para a mellora da rúa Blanco Amor, coa substitución do pavimento, das beiravías, a remodelación de xardíns, para gañar ancho de vía e aparcamento; e a colocación de varandas de seguridade.

Seis meses despois de iniciarse o procedemento de licitación, o Goberno de Compostela Aberta acorda desistir dun procedemento de adxudicación que se mantiña paralizado “á espera dunha decisión política ao respecto”, segundo tiñan informado os propios técnicos municipais, consultados para valorar a situación actual do proxecto. O informe técnico, de 30 de outubro, aconsellaba que “o proxecto debería actualizarse, mediante a súa modificación para dar cumprimento a nova Lei de Accesibilidade”.

Transcorridos máis de dous meses daquela recomendación sen que o Goberno adoptara ningunha decisión ao respecto, o Grupo Popular propuxo o acordo de actuar en consecuencia e que se procedera á licitación "á maior brevidade posible", tendo en conta que as necesidades que deron lugar a eses dous proxectos persistían e que as citadas actuacións contaban coa previsión orzamentaria necesaria para a súa execución.

De nada valeu o acordo unánime, nin a existencia de orzamento, nin a persistencia das necesidades duns servizos básicos que se poderían ter resolto acometendo estes proxectos: o Goberno ignorou ou esqueceu este acordo, razón pola que, conforme ás demandas que temos recibido da veciñanza neste tempo, ao progresivo deterioro da zona e tratando de reactivar estas actuacións, propoñemos a adopción dun novo acordo que recolla o contido do anterior e que engada unha mención tamén a mellora do firme na totalidade do Camiño de Lermo, desde a rúa de Vista Alegre ata o entronque coa rúa dos Camallóns, que actualmente presenta numerosas fochancas e un firme irregular. En consecuencia o texto que se propón é o seguinte:

ACORDO:

O Pleno Municipal insta ao correspondente órgano do Goberno a que antes de que remate o actual ano 2017 proceda a licitar novamente a contratación das obras de actuacións viarias no sector 21-O Romáño e en Guadalupe-Vite Sector 40, para a súa execución ao longo do vindeiro ano; e que programe coa maior celeridade posible a mellora do firme do Camiño de Lermo desde a rúa de Vista Alegre ata a rúa dos Camallóns.

Santiago de Compostela, 15 de setembro de 2017.


Agustín Hernández
Portavoz do Grupo Municipal do Partido Popular

Sr. Alcalde do Concello de Santiago de Compostela